

### 3. Szene – Bi de Banfits

Personen: Debora, Franziska, Mirko, Ergün, Jens, Tom, weitere Banfits

*Ergün und Jens positionieren sich im Dunkeln an der Bühnenwand. Debora humpelt mit ihrem Gipsbein und Krücken durch den Saal – suchend. **Spotlicht folgt ihr.***

Debora Haaaalooo. Ich glaub's einfach nöd. Jetzt wott mir d'Franziska vor em Heigah no schnäll öppis i dere alte Fabrik zeige – und verschwindet plötzlich spurlos! *Ruft laut:* Franziskaaaa! Isch ihre ächt öppis passiert? *Humpelt auf die Bühne.* Wänn sie also da hinde nöd füre chunnt, dänn gahn ich hei! S'isch mir z'unheimlich da! *Ruft leiser, zögerlich:* Franziska?

*Ergün & Jens lösen sich von der Wand und umstellen breitbeinig die verängstigte Debora.*

Debora *erschrickt:* Hhhh! Eeee, wo isch d'Franziska?

Ergün Wo isch wär?

Debora D'Franziska. Sie isch vorher da ine gange. Haltet ihr sie versteckt?

Ergün *lacht abschätzig:* Hä, hä versteckt?! Das konkret sicher nöd, ey!

Debora Ja dänn ..... dänn gang ich halt wieder. *Will weg humpeln.*

Jens *packt sie am Arm:* Schön langsam! Da gaht niemert furt, ohni dass de Boss entscheidet! Mitcho!

*Die Jungs packen Debora an den Armen und ziehen sie energisch mit sich. Gehen ab. Danach „installieren“ sich Franziska & Co. auf Bühne. Bühnenrückwand mit Tags und Graffitis verziert, alter Polstersessel, Sektflaschen und -kisten, dazu laut dröhnende Hip-Hop-Musik aus einem Musikgerät -> muss während den folgenden Sätzen langsam ausgeblendet werden. Franziska (nun mit schwarzem Ledermantel) fläzt sich im Sofasessel, andere Banfits hängen herum.*

*Ergün und Jens erscheinen mit Debora in ihrer Mitte von hinten an die Szene.*

Ergün *übertönt laut die Musik:* Hey Franz! Mir händ da öpper. Zu Debora, nachdem Franziska lässig mit Hand Ok-Zeichen gibt: Los, chasch ine ga. De Franz wartet.

Debora De Franz?

Jens Logo, de Franz isch oise Boss, Mann!

*Jungs positionieren sich beim Eingang. Debora hinkt von hinten auf den Sessel von Franziska zu. Stösst unterwegs mit der Krücke eine herumstehende Sektflasche um.*

Debora *erstaunt:* Du?! Du bisch de Boss, Franziska?

Franziska Franz! Da säged mir alli nume Franz! Drum heisst au d'Bandi Banfits – d'Abchürzig vo Bandi und Franz.

Debora Das isch die Bandi, wo du im Spital devo verzellt häsch?

Franziska Mini Bandi! Jetzt wo du oises Versteck kännsch, muesch au Mitglied werde bi ois. Du häsch gar kei anderi Wahl!

Debora *unsicher:* Ich ..... weisch .....

Ergün *unterbricht:* Franz, ey, chunnt no öpper – de Mick!

Franziska Alles klar, de chasch ine lah.

*Mirko erscheint, flankiert von Ergün und Jens.*

Mirko Wow Deby, cool bisch au debi. Freut mi voll ey!

Franziska Deby – das isch de Mick. So säge mir ihm bi de Banfits.

Debora Jaaa und eh ..... und was mached ihr dänn so i dere Bandi?

Franziska Ha! Los mal zue:

*Lied – „ Banfits “ & Choreo im Refrain*

Mirko Deby, hät dir de Franz schon vo de Muetprob verzellt?